



## საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

### თეატრალური სარდაფი

თეატრალური სარდაფი, კერძო თეატრი. დამფუძნებლები არიან რეჟისორები: გ. მარგველაშვილი, ლ. წულაძე, ა. ვარსიმაშვილი, ო. ეგაძე; პროდიუსერი გ. ხარაბაძე (შვილი); მხატვარი შ. გლურჯიძე; მსახიობი გ. ხარაბაძე; აღმასრულებელი დირექტორი – ე. მაზმიშვილი. თეატრი გაიხსნა 1997 წ. 31 მარტს რეჟ. ა. ვარსიმაშვილის სპექტაკლით – ა. სტრინდბერგის „სიკვდილის როკვა“ (მონაწილეობდნენ მსახიობები: რ. ჩხიკვაძე, გ. სალარაძე, ნ. ფაჩუაშვილი, კ. კავსაძე). თ. ს. წარმოადგენდა დამოუკიდებელ შემოქმედებით სივრცეს ახ. ტიპის ორგანიზაციული მოდელით – თეატრს არ ჰყავდა სამხატვრო ხელმძღვანელი, საბჭო, მსახიობთა მუდმივი დასი. არ ჰქონდა მუდმივი რეპერტუარი, სახელმწ. დაფინანსება და მთლიანად სალაროს შემოსავალზე არსებობდა. თ. ს. მუშაობდა ანტრეპრიზის პრინციპით (ყოველი სპექტაკლისათვის ახ. დასის მოწვევა). 1998 თ. ს-მა საკუთარი სახსრებით ააშენა თეატრის ფოიე და პატარა კაფე „მცირე დარბაზი“, სადაც სპექტაკლის ანტრაქტებში გამოდიოდნენ ქუჩის მუსიკოსები. 1999-იდან თ. ს-ში დაფუძნდა თეატრის „ორშაბათები“, რ-ებზეც ხდებოდა ახალგაზრდა რეჟისორებისა და დრამატურგების შეხვედრა, გამოფენების წარდგენა, წიგნების პრეზენტაცია, პოეტები კითხულობდნენ ლექსებს. თ. ს. სპექტაკლის დასადგმელად იწვევდა ყველა პროფესიონალ რეჟისორს, რ-იც ვერ ახორციელებდა თავის იდეას აკად. თეატრებში. 1997-იდან თ. ს-ში დაიდგა სპექტაკლები: რეჟ. ლ. წულაძე – ბ. ბრეხტის „სამგროშიანი ოპერა“, ა. შნიცლერის „კაბანოვას დაბრუნება“, ბ. ბარათაშვილის „აკუსტიკა“, თ. მანის „მარიო და ჯადოქარი“, რეჟ. ო. ეგაძე – კ. მანიეს „ბლეზი“, ე. იონესკოს „ორთა ბოდვა“, ი. სოლომონაშვილის „ქვირითობა“; რეჟ. ა. ვარსიმაშვილი – უ. შექსპირის „ჰამლეტი“ და ბ. ბრეხტის „მესამე იმპერიის შიში და სასონარკვეთა“; რეჟ. გ. ქაჩიბაია – ი. სამსონაძის „პანანინა ციციქნა გოლიათი“; რეჟ. დ. ქვარცხავა და სხვ. 1999 აქ წარმოდგენები გამართა სოხუმის დრამ. თეატრმა. თ. ს-ში სტუმრად იყო ბერეგოვოს (უკრაინა) ეროვნ. თეატრი, ბულგარული დასი „კრედო“, ბერლინის პლასტ. დრამის თეატრი უ. შნიტკეს ხელმძღვანელობით, ქუთაისის თეატრ-სტუდია, ბათუმის „თითების თეატრი“. 2000

თეატრმა მონაწილეობა მიიღო საერთაშ. ფესტივალებზე ლონდონში, ბულგარეთში,  
იუგოსლავიასა და სხვ.

---